

Si e decreto bin cla

Ley di cacho lo drenta na vigor entrante luna di october

ORANJESTAD – E trabou pa implementa e ley di cacho cayehero ta canando riba un bon caminda y eventualmente e lo bin na vigor na luna di october awor.

Comisario Truddy Hassell kende ta encarga cu e plataforma pa e ley aki, a bisa cu e ley aki por haya bida y forsa, despues cu e wordo aproba pa Parlamento, expresando su satisfaccion riba e proceso aki.

“E trabou ta bayendo hopi bon”, el a bisa. Naturalmente manera e ley ta bisa den su ultimo articulo mester bin un decreto gubernamental unda e minister ta haci publico ki dia e ley ta vigente y esaki mester tuma luga ainda. Nan ta spera cu otro siman lo consolida den un proximo reunion tur e diferente consehonan di e comisionnan cu a wordo instala. E documento dossier producto di e consehonan duna lo wordo presenta na e ministernan concerni.

Decreto gubernamental
E plataforma di e ley di cacho kier entrega e documento aki no mas tarda cu e di dos siman di september, ya cu nan deseo ta di start sali dia 1 di october cu e comision di informacion y educacion. Den e caso aki e ministernan lo tin dos siman di tempo pa firma e decreto, pero e plataforma cu tin di haber cu e ley aki ta spera cu e presentacion cu e

mandatario lo haya tocante ehecutacion di e ley aki, nan no lo tin mucho obhecacion. E documento ta bon mira un apoyo pa nan presenta den seno di Consejo di Minister pa haya e aprobacion total di e proyecto.

Nan ta boga pa e ley importante aki drenta na vigor dia 1 di october, pero ta e ministernan concerni ta esun cu finalmente ta stipula e fecha exacto.

Comisionnan y presentacion

E ultimo siman cu a pasa e plataforma encarga cu implementacion di e ley aki a haya un presentacion di e comisionnan di cacho cayehero. Nan ta cuater comision: comision di informacion y educacion; comision encarga cu e cachonan cayehero, comision di financia y comision di legislacion. E dos prome comision ya caba a duna su presentacion na e plataforma y nan lo traha un documento for di nan perspectiva cu lo forma parti di un dossier cu lo wordo presenta na e tres minister envolvi cu ta minister di Husticia, Minister di Turismo y Minister di Salubridad. Di e forma aki nan por haya nan aprobacion di e proyecto aki, y asina cuminsa cu ehecutacion di e ley di cacho cayehero.

Den e presentacion di e comision di Informacion y



Educacion ya caba nan a delinea e proyecto aki no solamente riba e tereno di suministra informacion riba e ley di cacho, sino di conscientisa nos comunidad. E proceso aki lo cuminsa dia 1 di october 2014 y lo finalisa fin di januari 2015. Nan ta spera cu pa e tempo ey hunto cu Ministerio Publico lo stipula con e boet mester ta ora cu ley di cacho ta wordo viola. Nan ta informacion amplio cu lo wordo suministra na publico prome cu e ley drenta na vigor strictamente.

E dos comision encarga cu tin di haber directamente riba e forma con e captura di e cacho a haci su presentacion y tambe a haya su aprobacion di e plataforma, y nan ta cla pa drenta den accion, pero esaki ta depende di e ley cu mester drenta na vigor.

E comision financiero ta esun

encarga di canalisa e recursonan di placa pa duna bida na e proyecto aki. Dependiendo di e otro comisionnan, comision di Financia ta esun cu ta delinea cuanto ta bay costa pa ehecuta e proyecto aki. Ainda no tin un cifra total, pero e ta un proyecto costoso. Sinembargo ya caba nan a haya algun donacion di un compania di auto cu a duna un Van specialmente pa transporta e cachonan pa un shelter. E comision ta hopi contento cu e donacion aki y publicamente durante un conferencia di prensa nan lo anuncia e nomber di e compania cu a haci tal gesto.

E ultimo comision ta esun cu tin di haber cu legislacion y nan tin como tarea no solamente di traha e decreto pa pone e ley na vigor pero tambe di analisa tur e otro leyman existente y cu mester wordo adapta pa e ley di cacho por bira ainda mas efectivo.

Meta

Comisario Hassell a bisa cu intencion no ta di sacrifica e cachonan captura sino cu e doño por busca nan y para responsabel pa nan mascota. Nan mester garantisca cu nan ta bay cuida e cacho debidamente y tambe esunnan cu ta adopta un cacho. E cacho cu su doño no ta aparece lo wordo poni den adopcion pa un periodo di tempo. E intencion ta pa brinda nan un di dos oportunidad. Si den e

periodo aki no ta wordo haya un doño nobo, lamentablemente mester poni drumi.

Igualmente tin un aspecto di salubridad cu mester tene na cuenta. Kiemen e cachonan captura den mal condicion lo haya asistencia di Veterinario, pero si e situacion di e cacho ta uno deplorable y no ta wordo cura den tempo cortico nan ta pone drumi. “Nos meta principal no ta pa mata cacho, nos meta principal ta pa kita cacho for di caminda publico”, el a bisa.

Aspecto financiero

Ya caba algun comision a presenta nan presupuesto riba e cantidad di placa cu nan mester pa ehecuta e diferente proyectonan cu nan tin, pa ehemplo e comision di informacion y educacion mester suministra informacion na e media, red social, flyer y charla na scol, etc.

Naturalmente esakinan tin su costo y p’esey nan a presenta un cuadro financiero. Igualmente e comision encarga cu e parti di captura di cacho cayehero ta trahando riba su presupuesto actualmente. Nan gastonan ta relacion cu tur e material pa captura e cachonan entre nan haulanan, van condiciona pa transporta cacho, remedi of sedante pa pone e cacho drumi, etc.

Continua riba Pagina 4

Continuacion di Pagina 5

Inicialmente e ehecutacion di e proyecto aki lo wordo ehecuta den e area turistico, ya cu esaki ta un di e prioridadnan considerando cu nos turismo ta e base di nos economia y e cantidad di keho cu ta drenta for di e turistanan pa e problematica aki. Mirando cu e plataforma kier salvaguardia nos turismo nan ta spera cu minister di Turismo lo por yuda nan den e parti financiero pa asina recoge tur e cachonan den e area turistico.

Di otro banda nan tin hopi

boluntarionan cu ta dispuestu di yuda den e proyecto aki. E plataforma encarga di duna bida na e ley di cacho cayehero ta spera cu nan por haya aprobacion pa por subi caya y haya donacionnan di henter comunidad, specialmente esunnan cu ta dispuestu pa soluciona e problema aki na Aruba.

E di tres opcion di financiamiento ta con activamente nan por recauda fondo pa e proyecto aki por bira uno duradero. Comisario Hassell a bisa cu nan meta ta pa e proyecto aki por bira uno

duradero, pues no uno di un año so pero nan ta premira cu e por dura por lo menos 5 año prome cu nan por trata di soluciona e problema aki na Aruba. Y principalmente cu den e tempo aki e simia di conscientisacion lo duna fruta satisfactorio.

Educacion

El a informa cu e comision di Informacion y Educacion tin un tarea grandi pa sembra e simia di conscientisacion den nos comunidad riba atencion, cuido y responsabilidad di nan mascota. “Educacion pa e hendenan

compronde y bira consciente cu kico nan ta haciendo no ta bon”, el a declara.

E ta considera e tarea aki sumamente importante di full e proyecto aki. Ya cu di ki bal cu nan ta bin cu un ehecutacion di un ley pa evita cacho riba caya, y e hendenan ta sigui haci esey sin mas, pues e proyecto no ta bira exitoso.

E ta spera cu e campaña cu e comision tin pensa di trece lo ta efectivo y tur hende por bira consciente di e consecucionan di e acto di no cuida un cacho of tira un cacho riba via publico. □